

Fundur stjórnar KSÍ, 26. nóvember 2020

Reglugerð KSÍ um félagaskipti, samninga og stöðu leikmanna og félaga

Tillaga að breytingu á ákvæðum er varða samninga leikmanna, málsmeðferð fyrir samninga- og félagaskiptanefnd KSÍ og skráningargjaldi félagaskipta.

Breytingar sem lagðar eru til eru **grænmerktar**.

Það sem lagt er til að falli út er **rauðmerkt** og **yfirstrikað**.

Lagt er til nýtt ákvæði 14.10:

14.10 Gildi leikmannssamnings skal ekki vera háð fyrirvara um niðurstöðu læknisskoðunar leikmanns og/eða háð útgáfu atvinnu- og dvalarleyfis leikmanns á Íslandi.

Lögð er til eftirfarandi breyting á grein 14.16.1.:

14.16 Vanefndir:

14.16.1. Félögum ber að uppfylla þær fjárhagslegu skuldbindingar sem það tekur á sig gagnvart leikmönnum og öðrum félögum skv. efni þeirra leikmanna-, sambands- eða félagaskiptasamninga sem það er aðili að. **Samningsákvæði sem heimila félögum aukinn greiðslufrest til að standa skil á greiðslum til samningsleikmanns sem fallið hafa í gjalddaga skv. efni samningsins eru óheimil.**

Lögð er til eftirfarandi breyting á grein 15.3:

15.3. Þegar tilkynning um félagaskipti er fullfrágengin, undirrituð af leikmanni, félagi sem gengið er úr og félagi sem gengið er í, auk þess sem skráningargjald er greitt, skal gefa út keppnisleyfi sem tekur gildi með nýju félagi næsta dag eftir að öllum ofangreindum formsatriðum hefur verið fullnægt.

15.3.1. Skráningargjald félagaskipta leikmanna 16 ára og eldri **innanlands** skal vera kr. 2.000,-. Skráningargjald félagaskipta leikmanna yngri en 16 ára **innanlands** skal vera kr. 1.000,-.

15.3.2. **Skráningargjald félagaskipta leikmanna 18 ára og eldri úr erlendu félagi hingað til lands skal vera kr. 5.000,-. Skráningargjald félagaskipta leikmanna yngri en 18 ára úr erlendu félagi hingað til lands (FIFA Minor transfer) skal vera kr. 10.000,-.**

15.3.3. Skráningargjald, skv. gr. 15.3.1., skal falla niður sé um að ræða félagaskipti leikmanns á milli félaga sem tefla fram sameiginlegu keppnisliði í 2. flokki karla og/eða kvenna.

Lögð eru til eftirfarandi breyting á grein 23.:

23. gr.

Hlutverk nefndarinnar

23.1. Ef ágreiningsefni kemur upp milli félags og leikmanns vegna túlkunar á samningsatriðum skal nefndin leysa úr ágreiningi aðila. Fara skal eftir eftirfarandi meginreglum:

23.1.1 Kröfur aðila skulu vera skýrar og lagðar fram skriflega **á stöðluðu formi KSÍ**.

23.1.2. Nefndin tekur afstöðu til ágreiningsefnisins með úrskurði eftir að hafa gefið aðilum kost á að gera kröfur, færa fram sönnunargögn, kynna sér gögn málsins og tjá sig um sakarefni. Gæta skal jafnræðisreglu.

- 23.1.3. Niðurstaða samninga- og félagaskiptanefndar um ágreiningsefnið er endanleg og bindandi fyrir deiluaðila.
- 23.1.4. Hvor aðili fyrir sig getur þó farið fram á að ágreiningurinn verði lagður í gerð, sbr. lög nr. 53 frá 1989 um samningsbundna gerðardóma, og skal krafa um slíkt lögð fram skriflega áður en nefndin tekur málið til efnislegrar meðferðar. Skal hvor aðili þá skipa einn mann í gerðardóm og skal Héraðsdómur Reykjavíkur skipa oddamann.
- 23.2. Ágreining milli íslenskra félaga við félagaskipti, m.a. um greiðslur o.fl., skal leggja fyrir samninga- og félagaskiptanefnd og skal málsmeðferð vera með sama hætti og fram kemur í grein 23.1. Úrskurður nefndarinnar er endanlegur og bindandi fyrir alla málsaðila. Ágreining við erlent félag er þó hægt að leggja fyrir FIFA.
- 23.3. Samninga- og félagaskiptanefnd tekur einnig á öðrum málum þar sem ákvæði reglugerðar þessar eða annarra reglugerða KSÍ heimila málskot til hennar.
- 23.4. Úrskurðir og ákvarðanir samninga- og félagaskiptanefndar er ávallt endanlegir og bindandi fyrir málsaðila og verður ekki áfrýjað eða skotið til aga- og úrskurðarnefndar KSÍ, áfrýjunardómstóls KSÍ eða annarra dómstóla innan íþróttahreyfingarinnar. Jafnframt skuldbinda málsaðilar sig til að skjóta ágreiningi sem nefndin hefur úrskurðað í ekki til almennra dómstóla.
- 23.5. Samninga- og félagaskiptanefnd setur sér nánari starfsreglur sem samþykktar skulu af stjórn KSÍ.
- 23.6. Ágreiningsefni til samninga- og félagaskiptanefndar skal hafa borist nefndinni skriflega innan árs frá því að atvik að baki ágreiningsefninu átti sér stað. Berist nefndinni erindi eftir þetta tímamark skal nefndin vísa málinu frá.
- 23.7. Aðili/félag sem vísar ágreiningsefni til úrlausnar hjá samninga- og félagaskiptanefnd skal greiða gjald til KSÍ. Gjaldið skal vera kr. 15.000,- og er óendurkræft.

Greinargerð:

Í fyrsta lagi er um að ræða tillögur að breytingum er varða samningsgerð á milli félags og leikmanns. (14.10 og 14.16.1.). Tillögur þessar eru tilkomnar vegna ákvæða í reglugerð FIFA um stöðu og félagaskipti leikmanna (FIFA regulations on the status and transfer of players). Tiltækin ákvæði þeirrar reglugerðar er bindandi og verða að vera í reglugerðum aðildarsambanda FIFA, þ.á.m. KSÍ. Tillagðar breytingar miða að því að greinar 18.4. og 18.6 í reglugerð FIFA séu innleiddar í reglugerð KSÍ um félagaskipti, samninga og stöðu leikmanna og félaga.

Í öðru lagi er um að ræða breytingar á skráningargjöldum vegna afgreiðslu félagaskipta. Skráningargjald félagaskipta hefur haldist óbreytt svo árum skiptir. Raunin hefur þó orðið sú að umfang afgreiðslu félagaskipti leikmanna erlendis frá hefur aukist til muna og sérstaklega félagaskipti leikmanna yngri 18 ára (FIFA transfer of minors). Rétt þykir að skráningargjald slíkra félagaskipti nemi hærra gjaldi en skráningargjald vegna innlendra félagaskipta.

Í þriðja lagi snúa breytingartillögur þessar að því að ágreiningsmál fyrir samninga- og félagaskiptanefnd skuli vera lögð fram á stöðluðu formi KSÍ. Borið hefur á því að ágreiningsmál sem berast nefndinni séu afar illa unnin og ekki skýrlega greint á milli krafna sem gerðar eru og málavaxta. Til hægðarauka fyrir bæði málsaðila og samninga- og félagaskiptanefnd er lagt til að ágreiningsmál skuli vera lögð fram á stöðluðu formi sem útbúið er af KSÍ.

Í fjórða lagi er lagt til að gjald skuli vera greitt til KSÍ vegna ágreiningsmála sem vísað er til nefndarinnar. Í dag berast nefndinni reglulega mál sem kunna að vera vanreifuð, hafi litla þýðingu en engu að síður flókin. Mikill tími og vinna skrifstofu og nefndar meðlima liggur að baki hverjum úrskurði nefndarinnar og því réttmætt að lágmarksgjald skuli greitt vegna málsmeðferðar.

Meðfylgjandi eru tillögur að breytingum á starfsreglum samninga- og félagaskiptanefndar og drög að stöðluðu formi vegna ágreiningsmála fyrir nefndinni.